

# INUIT ATAQATIGIIT

## INATSISARTUNI



UPA 2014/60  
15.05.2014  
Mimi Karlsen

### **Aatsitassanut ilinniarfiup Nunatta kujasissortaani immikkoortortaqaqarfeqalersinnaanera pillugu Naalakkersuisut misissueqqullugit peqquneqarnissaannik Inatsisartut aalajangiiffisassaattut siunnersuut.**

(Inatsisartuni ilaasortat Knud Kristiansen aamma Gerhardt Petersen, Atassut)

Aatsitassarsiornermik Ilinniarfiup Nunatta kujataani immikkoortortaqaqalersinnaaneranik Naalakkersuisut misissuinissamik peqquneqarnissaannik Inatsisartut aalajangiinissaannik Atassummiit siunnersuuteqartut Inuit Ataqatigiit qutsavigiumavaat.

Inuit Ataqatigiit ilinniarfiit sinerissami siammasissumiinnissaat isumaqatigaat. Kikkut tamaasa ilinniallaquneranni illoqarfiit tamarmik ilinniartoqaqarfeqarnissaat periarfissaassaaq pitsaasoq, ilaatigut najugaq qimannagu inuit ilaat ilinniagaqarsinnaassagaluardmata.

Ilinniarfiit kissaatigisagut assigiinngitsuusinnaapput, soorlu atisalionermut ilinniarfik, ammit atorluarnissaannik ilinniarfik il.il.

Taama oqareerluta Naalakkersuisut isumaqatigaagut ima oqarmata :

*"Sisimiut avataanni immikkoortortamik pilersitsilluni Aatsitassarsiornermik Ilinniarfimmik siammaaneq ilaatigut ininik ilinniartitsiviusunik, ilinniartut inaannik, allaffissornermik, sungiusarfinnik aamma atortunik immikkut ittunik akisoorujussuarnillu il.il. pilersitsinermut annertuunik aningaasartuuteqarnermik kinguneqassaaq. Tamanna pissusissamisoortut Naalakkersuisut isiginngilaat.*

Aatsitassarsiornermut ilinniarfiup aamma pisariaqartittarpai maskiinat angisuut. Taakkulu Sisimiuni ataatsimoorfeqarneri aatsitassarsiornermut ilinniartuulluni pingaaruteqaqaaq. Taamaammat ilinniarfik aamma atortutigut eqiteruffiusoq matumani pisariaqarpoq.

Nunatsinni assassorluni qitiusumik ilinniarfiit tassaapput pisortat suliffeqarfiutaat namminersortut taakkulu siulersuisoqarput immikkut 5-7-inik ilaasortalinnit.

Siulersuisullu suliniutigissavaat, ilinniarfiup sapinngisamik annertunerpaamik, ilinniartut aamma suliffeqarfiit inuutissarsiutinik ilinniagaqarnissamik ingerlatsisarnissaa, piginnaasaqalerfiusunik neqeroorutai aamma allatigut ilinniartitsinermik aaqqissuussinernik aallartitsinissai aamma isertitsiffiusunik ingerlatsinermut tunngasut, kiisalu ingerlassat naapertuuttut allat pillugit aalajangiisassallutik.

Taamaammat Inuit Ataqatigiit isumaqarput aatsitassarsiornermi ilinniarfik immikkoortortaqaqassappat tassaasoq siulersuisut innersuussutaat. Siunnersuummilu uani taama pisoqanngimmat Inuit Ataqatigiit siunnersuut itigartippaat.